

Na osnovu člana 16. stav 1. tačka 1., a u vezi sa članom 165. Zakona o zaštiti od požara i vatrogastvu („Službene novine Federacije Bosne i Hercegovine“, broj: 64/09) i člana 24. tačka 2. i člana 118. Statuta općine Cazin („Službene novine Općine Cazin“, broj: 13/10) Općinsko vijeće općine Cazin, na sjednici održanoj dana 31.07.2012. godine d o n o s i:

O D L U K U

O ORGANIZACIJI I FUNKCIONISANJU ZAŠTITE OD POŽARA I VATROGASTVA NA PODRUČJU OPĆINE CAZIN

I – OPĆE ODREDBE

Član 1.

Ovom Odlukom uređuje se nadležnost općinskih organa vlasti i organa uprave u izvršavanju poslova zaštite od požara i vatrogastva, organizacija i funkcionisanje zaštite od požara, planiranje i provođenje mjera zaštite od požara, organizacija i funkcionisanje vatrogastva, vatrogasne intervencije, stručno osposobljavanje i usavršavanje zaposlenih lica i vatrogasaca, financiranje, nadzor i inspekciju i druga pitanja od značaja za organizaciju i funkcionisanje zaštite od požara i vatrogastva na području općine Cazin (u daljem tekstu: Općina).

Član 2.

Zaštita od požara i vatrogastvo na području Općine čine sastavni dio jedinstvenog sistema zaštite i spašavanja ljudi i materijalnih dobara od prirodnih i drugih nesreća (u daljem tekstu: prirodne i druge nesreće), koji je uređen Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10), pa se radi toga zaštita od požara i vatrogastvo organizuju i funkcionišu u okviru tog sistema, a vrše se na način predviđen Zakonom o zaštiti od požara i vatrogastvu („Službene novine Federacije BiH“, broj: 64/09), (u daljem tekstu: Zakon).

Član 3.

Zaštita od požara je djelatnost od posebnog interesa za Općinu.

Vatrogastvo je obavezna javna služba, čija je osnovna djelatnost zaštita i spašavanje ljudi i materijalnih dobara od požara i čije neometano obavljanje osigurava Općina.

Vatrogasna djelatnost je stručna i humanitarna djelatnost od posebnog javnog interesa za Općinu.

Vatrogasna djelatnost obuhvata aktivnosti na gašenju požara i spašavanju ljudi i materijalnih dobara ugroženih požarom i eksplozijom, pružanju tehničke pomoći u nezgodama i opasnostima izazvanim prirodnim i drugim nesrećama, učešće u provođenju preventivnih mjera zaštite od požara i eksplozija, kao i obavljanju drugih poslova vezanih za zaštitu i gašenje požara, spašavanje ljudi i materijalnih dobara ugroženih požarom.

Djelatnosti utvrđene u ovom članu ostvaruju se na način utvrđen Zakonom, podzakonskim propisima donesenim na osnovu Zakona, međunarodnim tehničkim normativima i standardima koji važe u Bosni i Hercegovini, a koji se odnose na mjere zaštite od požara predviđene Zakonom, propisima Unsko - sanskog kantona (u daljem tekstu: Kanton), ovom Odlukom i drugim odlukama Općinskog vijeća općine Cazin iz oblasti zaštite od požara i vatrogastva koje su u nadležnosti Općine.

Član 4.

Zaštita od požara obuhvata skup mjera i radnji upravne, organizacijske, stručne, tehničke, obrazovne i propagandne prirode, koje se poduzimaju u cilju spriječavanja izbijanja i širenja požara, njegovog otkrivanja, te zaštite ljudi, biljnog i životinjskog svijeta, materijalnih, kulturnih, historijskih i drugih dobara i okoliša (u daljem tekstu: materijalnih dobara).

Vatrogastvo obuhvata skup mjera i radnji upravne, organizacijske, stručne, kadrovske, tehničke, obrazovne i propagandne prirode, koje se poduzimaju u cilju gašenja požara i spašavanja ljudi i materijalnih dobara ugroženih požarom, te pružanje tehničke pomoći u akcidentnim situacijama, koje se provode na području Općine.

Član 5.

Niko nema pravo da svojim materijalnim dobrima i svojim postupcima, neprovođenjem mjera zaštite od požara, propisanih Zakonom i drugim propisima iz člana 3. ove Odluke, dovodi u opasnost od požara tuđi život i zdravlje, te materijalna dobra.

Svako fizičko lice na području Općine ima pravo na zaštitu svog života i zdravlja od požara, koje se osigurava u skladu sa Zakonom i drugim propisima iz člana 3. ove Odluke.

Član 6.

Odredbe propisane Zakonom i drugim propisima iz člana 3. ove Odluke primjenjuju se i na tehnološke eksplozije koje nastaju kao posljedica upotrebe zapaljivih tečnosti, plinova, čvrstih i praškastih hemijskih materija (jedinjenja i smjesa), te ostalih gorivih materija koje sa zrakom mogu stvoriti eksplozivnu smjesu (u daljem tekstu: eksplozije).

Član 7.

U svrhu popularizacije vatrogasne djelatnosti i značajnijeg poduzimanja aktivnosti u provođenju preventivnih mjera zaštite od požara, ustanovljena je manifestacija pod nazivom „MJESECI ZAŠTITE OD POŽARA“ koja se održava svake godine tokom maja i oktobra, a organizuje je i provodi Služba za civilnu i protivpožarnu zaštitu - Vatrogasna jedinica, dobrovoljna vatrogasna društva na području Općine u suradnji sa vatrogasnim savezima Kantona i Federacije.

Član 8.

Pojmovi koji se koriste u ovoj Odluci imaju slijedeća značenja:

- 1) **Vatra** je kontrolirano samoodrživo sagorijevanje koje je namjerno izazvano da bi se stvorili korisni efekti, čije je širenje u prostoru i vremenu kontrolirano;
- 2) **Požar** je nekontrolisano samoodrživo sagorijevanje koje se nekontrolisano širi u prostoru i vremenu;
- 3) **Požarna opasnost** je mogućnost ozljede i/ili oštećenja kao posljedica požara;
- 4) **Građevina** obuhvata stambene i druge zgrade i objekte;
- 5) **Građevine za javnu upotrebu** su škole, obdaništa, studentski i đачki domovi, starački domovi, bolnice, hoteli, moteli, pansioni, tržni centri, pozorišta, kino dvorane, sportske, koncertne i druge dvorane, stadioni, sale za konferencije, muzeji, aerodromi, željezničke i autobusne stanice, objekti kulturno – historijskog nasljeđa i drugi objekti;
- 6) **Mjere zaštite od požara** su sve organizacijske, tehnološke i tehničke mjere koje smanjuju rizik od požara i povećavaju požarnu sigurnost;
- 7) **Preventivne mjere zaštite od požara** su sve preventivne, organizacijske, građevinske i tehničko – tehnološke mjere koje smanjuju mogućnost za nastanak požara, a pri njegovom nastanku omogućavaju sigurnu evakuaciju: ljudi i imovine i spriječavaju njegovo širenje;
- 8) **Aktivne (represivne) mjere zaštite od požara** su tehničke mjere koje podrazumijevaju primjenu sistema aktivne zaštite od požara;
- 9) **Sistem aktivne zaštite od požara** obuhvata instalacije, uređaje i opremu za automatsko otkrivanje dojavu i gašenje požara, odvođenje dima i toplote iz požara, detekciju eksplozivnih gasova, rezervno snadbijevanje električnom energijom i drugo;
- 10) **Oprema, uređaji i druga sredstva za zaštitu od požara** su sva sredstva, uređaji i oprema koja se upotrebljavaju za sprečavanje i gašenje požara;
- 11) **Vlasnik imovine** je fizičko ili pravno lice, državni organ ili druga institucija sa zaštićenim najširim ovlaštenjem posjedovanja, korištenja i raspolaganja nekom stvari;
- 12) **Korisnik imovine** je fizičko ili pravno lice, državni organ ili druga institucija koji na osnovu ugovora koristi imovinu vlasnika sa preuzetom obavezom po pitanju zaštite od požara;
- 13) **Odgovorno lice** za organizaciju zaštite od požara je:
 - vlasnik, odnosno korisnik imovine kada se radi o privatnom vlasništvu,
 - rukovodilac organa uprave, upravne organizacije i drugog državnog organa Federacije, kantona, grada i općine,

- direktor odnosno drugo odgovorno lice u privrednom društvu i drugom pravnom licu, određeno općim aktom pravnog lica;
- 14) **Edukacija** je naučno zasnovani, planski i organizovani proces koji se izvodi pod rukovodstvom nastavnika (predavača), uz aktivno učešće polaznika nastave;
 - 15) **Akcident** je nezgoda, nesreća, namjerno ili nenamjerno izazvana, od čijih posljedica može stradati veći broj ljudi, nastati materijalna šteta, štetne posljedice po okoliš i dr.
 - 16) **Zaposleno lice** podrazumijeva zaposlenike u pravnim licima i drugim institucijama, kao i državne službenike i namještenike u organima državne službe Federacije, kantona, općine i grada.

II – PRAVA I DUŽNOSTI ORGANA OPĆINE

(1) Nadležnosti Općine

Član 9.

Općina u oblasti zaštite od požara i vatrogastva:

- 1) svojim propisom uređuje organizaciju i funkcionisanje zaštite od požara i vatrogastva na području Općine, u skladu sa Zakonom i propisima Kantona i osigurava provođenje te zaštite;
- 2) organizuje i provodi zaštitu od požara iz nadležnosti Općine u skladu sa Zakonom i propisima Općine;
- 3) organizuje Profesionalnu vatrogasnu jedinicu Općine za gašenje požara, te osigurava kadrovske, materijalne, tehničke i druge uslove koji su potrebni za uspješno i efikasno funkcionisanje te jedinice, u skladu sa Zakonom i propisima Općine;
- 4) utvrđuje procjenu ugroženosti od požara, kao i program razvoja zaštite od požara i vatrogastva iz nadležnosti Općine u okviru procjene ugroženosti, odnosno programa razvoja zaštite i spašavanja od prirodnih i drugih nesreća;
- 5) donosi plan zaštite od požara Općine i osigurava njegovu realizaciju;
- 6) planira i osigurava finansijska sredstva u budžetu Općine za potrebe zaštite od požara i vatrogastva;
- 7) vrši i druge poslove zaštite od požara i vatrogastva, u skladu sa ovim Zakonom i propisima Kantona.

Propisom iz stava 1. tačke 1. ovog člana utvrđuje se nadležnost općinskih organa vlasti u izvršavanju poslova iz stava 1. ovog člana, kao i pitanja iz člana 165. Zakona, od značaja za Općinu.

(2) Nadležnost Općinskog vijeća

Član 10.

U ostvarivanju prava i dužnosti u oblasti zaštite od požara i vatrogastva, Općinsko vijeće:

- 1) donosi Program razvoja zaštite i spašavanja od prirodnih i drugih nesreća na području općine Cazin kojim utvrđuje ciljeve, smjernice i strategiju razvoja zaštite od požara i vatrogastva od značaja za Općinu, na period od najmanje pet godina,
- 2) na prijedlog Općinskog načelnika, donosi Plan zaštite od požara Općine, kao aneks Planu zaštite od prirodnih i drugih nesreća,
- 3) na prijedlog Općinskog načelnika, donosi Odluku o organizaciji i funkcionisanju zaštite od požara i vatrogastva na području Općine,
- 4) donosi odluku o osnivanju Profesionalne vatrogasne jedinice,
- 5) donosi odluku o organizaciji i radu dimnjačarske djelatnosti,
- 6) svake godine do kraja februara, razmatra i ocjenjuje realizaciju Plana zaštite od požara, usvaja izmjene i dopune sa novonastalim promjenama, na prijedlog Općinskog načelnika.
- 7) donosi i druge odluke i ostale opće akte u oblasti zaštite od požara i vatrogastva, čije donošenje je u nadležnosti Općinskog vijeća.

(3) Nadležnost Općinskog načelnika

Član 11.

U ostvarivanju prava i dužnosti u oblasti zaštite od požara i vatrogastva, Općinski načelnik:

- 1) utvrđuje Procjenu ugroženosti od požara na području Općine, u okviru Procjene ugroženosti od prirodnih i drugih nesreća na području Općine Cazin, na prijedlog Službe;
- 2) predlaže Općinskom vijeću Program razvoja zaštite od požara i vatrogastva (prema potrebi), u okviru Programa razvoja zaštite i spašavanja od prirodnih i drugih nesreća na području općine Cazin;
- 3) predlaže Općinskom vijeću Plan zaštite od požara Općine i osigurava njegovu realizaciju;
- 4) organizuje i provodi zaštitu od požara iz nadležnosti Općine, u skladu sa Zakonom i kantonalnim Zakonom o zaštiti od požara i vatrogastvu (ako isti bude donesen) i ovom Odlukom, razmatra stanje zaštite od požara i vatrogastva na području Općine, te donosi odgovarajuće mjere za dogradnju i efikasno funkcionisanje sistema zaštite od požara i vatrogastva;
- 5) na osnovu Programa iz tačke 2. ovog člana, donosi godišnji plan aktivnosti na realizaciji zadataka, utvrđenih za zaštitu od požara i vatrogastvo, što se utvrđuje prema ranije definisanim prioritetima;
- 6) na prijedlog Službe, utvrđuje istraživačke i razvojne projekte u oblasti zaštite od požara i vatrogastva, njihove izvršioce i način financiranja tih projekata;
- 7) donosi akte o organizovanju i funkcionisanju zaštite od požara i vatrogastvu iz svoje nadležnosti;

- 8) u periodima pojačane požarne opasnosti, tokom godine, donosi Odluku o zabrani loženja vatre na otvorenom prostoru;
- 9) osigurava kadrovske, materijalne, tehničke i druge potrebe za efikasno funkcionisanje vatrogastva u Općini;
- 10) odgovoran je za funkcionisanje vatrogastva na području Općine;
- 11) planira i predlaže potrebna financijska sredstva u budžetu Općine za financiranje poslova zaštite od požara i vatrogastva iz nadležnosti Općine;
- 12) predlaže Općinskom vijeću donošenje odluka i drugih općih akata utvrđenih u članu 9. ove Odluke;
- 13) vrši i druge poslove zaštite od požara i vatrogastva iz nadležnosti Općine, u skladu sa ovom Odlukom, Zakonom i drugim propisima.

(4) Organi uprave, odnosno službe za upravu

Član 12.

Općinski organ uprave, odnosno službe za upravu u okviru svojih prava i dužnosti utvrđenih Zakonom, Satutom općine i drugim propisima iz oblasti zaštite od požara i vatrogastva, izvršavaju i osiguravaju izvršavanje zakona, drugih propisa i općih akata, staraju se o organizovanju i provođenju mjera zaštite u oblasti za koju su osnovane i odgovorne su za stanje te zaštite, prate stanje i predlažu mjere za razvoj i unapređenje zaštite od požara, vrše nadzor nad provođenjem zakona, planova zaštite od požara i provođenje preventivnih mjera zaštite od požara.

Općinske službe za upravu nadalje su dužne :

- 1) organizirati, planirati i osigurati provođenje preventivnih mjera za zaštitu vlastitih zaposlenika, materijalnih sredstava i objekata koje koriste u svom radu;
- 2) učestvovati u izradi planskih dokumenata iz oblasti zaštite od požara i vatrogastvu, u pitanjima iz oblasti za koje su osnovane, a koja se utvrde tim dokumentima, i to:
 - procjene ugroženosti od požara Općine, u okviru Procjene ugroženosti od prirodnih i drugih nesreća Općine;
 - programa razvoja zaštite od požara i vatrogastva (prema potrebi), u okviru Programa razvoja zaštite i spašavanja od prirodnih i drugih nesreća Općine;
 - plana zaštite od požara Općine, kao aneksa Plana zaštite i spašavanja od prirodnih i drugih nesreća;
- 3) u okviru svoje redovne djelatnosti, realizirati zadatke u oblasti zaštite od požara, koji su utvrđeni u dokumentima iz tačke 2. ovog člana, a koji se odnose na oblasti za koju su osnovane;
- 4) izrađuju nacрте i prijedloge odluka i drugih internih propisa u oblasti zaštite i spašavanja, a koji proizilaze iz Zakona i drugih propisa koji regulišu njihove oblasti;
- 5) ostvarivati stalnu suradnju sa Službom za civilnu i protivpožarnu zaštitu o svim pitanjima od značaja za planiranje, organizovanje i provođenje zaštite od požara i vatrogastva, iz nadležnosti Općine;

- 6) dostavljati Službi za civilnu i protivpožarnu zaštitu pisana obavještenja, podatke ili izvještaje o podacima vezanim za pitanje zaštite od požara i vatrogastva iz oblasti za koju su osnovane;
- 7) vrši i druge poslove u oblasti zaštite od požara i vatrogastva u skladu sa Zakonom, ovom Odlukom, te drugim propisima i općim aktima iz ove oblasti.

(5) Služba za urbanizam i zaštitu okoliša

Član 13.

Služba za urbanizam i zaštitu okoliša osigurat će da se pri izradi dokumenata prostornog uređenja, i to: prostornog plana Općine, urbanističkog plana, regulacionih planova i urbanističkih projekata, predvide prostorne i tehničke mjere zaštite od požara, a naročito:

- 1) uslove za efikasno spašavanje ljudi, životinja i materijalnih dobara;
- 2) potrebne razmake ili protivpožarnu udaljenost između objekata;
- 3) saobraćajne i manipulativne površine za interventna vozila;
- 4) izvore za dovoljno opskrbljivanje vodom za gašenje požara;
- 5) primjenu odgovarajućih materijala koji ne mogu biti uzročnicima nastanka i prijenosa požara.

Uz spomenute dokumente prostornog uređenja izrađuje se elaborat zaštite od požara, u kojem se razrađuju prethodno spomenute mjere zaštite od požara (član 28. Zakona).

Član 14.

Služba za urbanizam i zaštitu okoliša neće izdati odobrenja za građenje, odnosno izgradnju, rekonstrukciju, dogradnju i nadogradnju građevina, u kojim se proizvode ili skladište eksplozivne materije, zapaljive tečnosti ili gasovi, kao i privrednih i industrijskih građevina u kojima se ugrađuju postrojenja, uređaji i instalacije sa korištenjem zapaljivih tečnosti ili gasova, te građevina za kolektivno stanovanje (osim individualnih objekata), ako glavni projekt ne sadrži elaborat zaštite od požara (u daljnjem tekstu elaborat).

U komisiju za tehnički pregled izgrađene, rekonstruisane, dograđene ili nadograđene građevine, izuzev individualnih objekata, za poslove iz stava 3. ovog člana, imenovat će se i jedan član iz Službe za civilnu i protivpožarnu zaštitu ili drugog pravnog lica kojeg predloži ta Služba, kako je to propisano odredbama člana 37. i 38. Zakona.

Odobrenje za upotrebu izgrađene, rekonstruisane, dograđene i nadograđene građevine može se izdati tek pošto član komisije iz tačke 2. utvrdi i dokumentuje da su provedene sve mjere zaštite od požara predviđene u elaboratu iz člana 31. Zakona, kao i odgovarajuća pravila tehničke prakse, a posebno slijedeće:

1. primijenjeni građevinski materijali i elementi konstrukcije odgovarajućih požarnih karakteristika i vatrootpornosti koji su atestirani od strane ovlaštenih laboratorija;
2. osigurana podjela građevina u požarne sektore;
3. osigurane propisane karakteristike požarnih i sigurnosnih stepeništa i puteva evakuacije;

4. propisno obilježeni putevi evakuacije i izlazi prema požarnim i sigurnosnim stepeništima ili u siguran prostor;
5. osigurana funkcionalnost uređaja za odvođenje dima i topline protivpožarnih klapni, protivpožarnih vrata, hidrantske mreže, stabilnih instalacija za gašenje požara, uređaja/aparata za gašenje početnog požara, sistema za dojavu požara, sigurnosnog osvjetljenja (pomoćnoga i paničnoga) i druge predviđene mjere.

Služba za urbanizam i zaštitu okoliša je dužna jedan primjerak zapisnika odobrenja za upotrebu objekata iz stava 3. ovog člana, dostaviti Službi za civilnu i protivpožarnu zaštitu, radi vršenja određenih analiza i ažuriranja procjena ugroženosti.

Zabranjeno je korištenje građevine bez upotrebne dozvole, ako su za tu građevinu predviđene prethodno spomenute mjere zaštite od požara.

6) Služba za civilnu i protivpožarnu zaštitu

Član 15.

Služba za civilnu i protivpožarnu zaštitu, u oblasti zaštite od požara i vatrogastva, vrši slijedeće poslove:

- 1) poduzima odgovarajuće mjere i aktivnosti na organizaciji i provedbi zaštite od požara i vatrogastva na području Općine, u skladu sa Zakonom, propisima Kantona, ovom Odlukom i drugim propisima Općine;
- 2) obavlja stručne i druge poslove koji se odnose na organizovanje Profesionalne vatrogasne jedinice Općine, te predlaže i poduzima mjere na osiguranju kadrovskih, materijalnih, tehničkih i drugih uslova potrebnih za efikasan rad i funkcionisanje te jedinice, u kojim pitanjima ostvaruje saradnju sa Kantonalnom upravom civilne zaštite USK (KUCZ), odnosno inspektorima za zaštitu od požara i vatrogastvo;
- 3) definiše i predlaže pitanja koja se odnose na razvoj zaštite od požara i vatrogastva u okviru programa razvoja zaštite i spašavanja od prirodnih i drugih nesreća Općine, sve u saradnji s ostalim službama za upravu Općine;
- 4) izrađuje plan zaštite od požara Općine i osigurava njegovu realizaciju, uz sudjelovanje ostalih službi za upravu Općine;
- 5) planira i osigurava provedbu obuke i stručno osposobljavanje i usavršavanje pripadnika Profesionalne vatrogasne jedinice i drugih lica koja se bave poslovima zaštite od požara i vatrogastva;
- 6) pruža stručnu i drugu pomoć dobrovoljnim vatrogasnim društvima radi uspješnog obavljanja poslova zaštite od požara i vatrogastva iz njihove nadležnosti bitnih za vatrogastvo, a posebne aktivnosti provodi kod onih vatrogasnih društava u kojima je osnovana dobrovoljna vatrogasna jedinica ili Služba za zaštitu od požara, radi osposobljavanja te jedinice – službe za efikasno sudjelovanje u gašenju požara;
- 7) ostvaruje saradnju s pravnim subjektima u kojima su osnovane vatrogasne jedinice radi njihovog osposobljavanja za efikasno gašenje požara i mogućeg sudjelovanja tih jedinica na gašenju požara izvan objekata i prostora pravnog subjekta na području Općine;

- 8) ostvaruje saradnju sa službama civilne zaštite susjednih općina u vezi sa zajedničkim interesima za zaštitu od požara i vatrogastvo;
- 9) vrši i druge poslove iz oblasti zaštite od požara i vatrogastva koji su Zakonom, Zakonom kantona i ovom Odlukom stavljeni u nadležnost Službe za civilnu i protivpožarnu zaštitu.

Za vršenje prethodno spomenutih poslova u Službi za civilnu i protivpožarnu zaštitu osniva se unutrašnja organizacijska jedinica za zaštitu od požara i vatrogastvo (u daljnjem tekstu: Profesionalna vatrogasna jedinica).

III – PROGRAMIRANJE RAZVOJA ZAŠTITE OD POŽARA I VATROGASTVA

Član 16.

Programiranje razvoja zaštite od požara i vatrogastva na području Općine vrši se u okviru Programa iz člana 10. tačka 1. ove Odluke. To programiranje vrši se u skladu sa procjenom ugroženosti od požara iz člana 11. tačka 1. ove Odluke i drugih činjenica važnih za programiranje, na period od najmanje pet godina.

Programiranje razvoja zaštite od požara i vatrogastva iz stava 1. ovog člana obuhvata politiku, strategiju i akcione planove u okviru kojih se definiše vizija, načela i opredjeljenja, ciljevi i područje razvoja za organizovanje i provođenje zaštite od požara i vatrogastva sa svim elementima potrebnim za njegovo usavršavanje i efikasno funkcionisanje od značaja za Općinu za period od najmanje pet godina.

Na osnovu programa iz stava 1. ovog člana, Općinski načelnik donosi godišnji plan aktivnosti na realizaciji zadataka utvrđenih za zaštitu od požara i vatrogastvo iz člana 11. tačka 5. ove Odluke, što se utvrđuje prema utvrđenim prioritetima.

IV – ORGANIZACIJA I FUNKCIONISANJE, PLANIRANJE I PROVOĐENJE MJERA ZAŠTITE OD POŽARA

1. Organizacija i funkcionisanje zaštite od požara

Član 17.

Zaštita od požara na području Općine se organizuje i provodi u svim stambenim i drugim zgradama i objektima i na svim prostorima koji se smatraju građevinama prema članu 36. Zakona o prostornom planiranju i korištenju zemljišta („Službene novine Federacije BiH“, br. 2/06, 72/07 i 32/08) i Uredbi o tehničkim svojstvima koje građevine moraju zadovoljavati u pogledu sigurnosti te načinu korištenja i održavanja građevina („Službene novine Federacije BiH“, br. 29/07 i 51/08) koji, prema procjeni ugroženosti od požara, mogu biti izloženi opasnostima od izbijanja i širenja požara. Građevine i prostori iz stava 1. ovog člana utvrđeni su u članu 20. stav 1. Zakona.

Zaštita od požara se organizuje i provodi i za šume, šumska i poljoprivredna zemljišta i ostale prirodne resurse.

Zaštitu od požara na području Općine dužni su da organizuju i provode pravna i fizička lica, i druge institucije koje su vlasnici ili korisnici građevina i prostora iz stava 1. ovog člana i šuma, šumskog i poljoprivrednog zemljišta iz stava 2. ovog člana, koje se nalaze na području Općine (u daljem tekstu: vlasnici ili korisnici građevina i prostora).

Zaštitu od požara dužni su da organizuju i provode građani u svojim stanovima i stambenim zgradama (kućama), te drugim objektima i prostorima koje koriste za svoje potrebe.

Član 18.

Općina, kao jedinica lokalne samouprave, je osnovni nosilac organizovanja i provođenja zaštite od požara na području Općine, na način predviđen Zakonom i drugim propisima iz člana 3. ove Odluke.

Organizacija i funkcionisanje zaštite od požara u Općini utvrđuje se u Planu zaštite od požara Općine koji donosi Općinsko vijeće na prijedlog Općinskog načelnika.

Plan zaštite iz stava 2. ovog člana izrađuje se na osnovu procjene ugroženosti od požara područja Općine i kadrovskim, materijalnim i drugim uslovima koji su od značaja za tu zaštitu.

Sadržaj i način izrade Procjene ugroženosti od požara područja Općine i Plana zaštite od požara Općine vrši se prema propisu iz člana 22. stav 4. Zakona.

Član 19.

Sadržaj, način izrade, postupak usaglašavanja, donošenja, ažuriranja i čuvanja Plana zaštite od požara Općine utvrđen je Uredbom o sadržaju i načinu izrade plana zaštite i spašavanja od prirodnih i drugih nesreća i plana zaštite od požara („Sl. Novine FBiH“, broj: 8/11).

U cilju praćenja izvršenja Plana zaštite od požara iz stava 1. ovog člana, Općinsko vijeće svake godine do kraja februara razmatra i ocjenjuje njegovu realizaciju i vrši odgovarajuće izmjene sa novonastalim promjenama koje su važne za zaštitu od požara, kao što su urbanističke i građevinske promjene, kao i promjene namjene građevina i slično, te utvrđuje mjere za njegovu potpunu realizaciju, a posebno mjere koje se odnose na osiguravanje neophodnih finansijskih sredstava za realizaciju planiranih zadataka.

Plan zaštite od požara za vlastite potrebe izrađuju sva pravna lica koja se odrede u Planu zaštite od požara Općine, što se vrši prema propisu iz člana 29. stav 2. Zakona, kojim su građevine tih organa i pravnih lica razvrstane u odgovarajuće kategorije ugroženosti od požara.

Član 20.

Pravna i fizička lica dužna su izvršavati zadatke utvrđene u Planu zaštite od požara iz člana 19. ove Odluke, koji se na njih odnose.

Član 21.

Pravna lica, državni organi i druge institucije na području Općine, dužni su svojim općim aktom, a u skladu sa vrstom djelatnosti koju obavljaju i procesom rada, urediti pitanja koja se odnose na organizaciju i funkcionisanje zaštite od požara u

svojim objektima i prostorima, u skladu sa Zakonom i drugim propisima iz člana 3. ove Odluke.

Pravna lica, državni organi i druge institucije dužni su odrediti zaposleno lice, odnosno formirati stručnu službu za zaštitu od požara i utvrditi nadležnost te službe ako imaju veće izvore opasnosti, koji će biti zaduženi da se staraju o provođenju mjera zaštite od požara s tim da to lice, odnosno pripadnici službe budu posebno stručno osposobljeni za uspješno obavljanje poslova iz oblasti zaštite od požara.

Pravna lica, državni organi i druge institucije, dužni su upoznati sva zaposlena lica sa općim aktom iz stava 1. ovog člana, te provoditi stručnu obuku i osposobljavanje za zaštitu od požara na način predviđen u članu 128. Zakona.

Član 22.

Vlasnik ili korisnik građevine i prostora, i upravitelj stambenog objekta je odgovoran za zaštitu od požara u tim građevinama, odnosno objektima.

Vlasnik ili korisnik iz stava 1. ovog člana može ovlastiti pravno lice registrirano za obavljanje poslova iz oblasti zaštite od požara koje ima odgovarajuće stručne kadrove, opremu i sredstva za vršenje tih poslova, koje će za njihove potrebe provoditi mjere zaštite od požara, što se vrši zaključivanjem ugovora sa tim pravnim licima.

Za provođenje mjera zaštite od požara u višekatnim građevinama – stambenim objektima, može se ovlastiti upravitelj stambenog objekta, u skladu sa odgovarajućim propisom Kantona.

Član 23.

Općinsko vijeće svojom odlukom uređuje organizaciju i rad dimnjačarske djelatnosti, rokove čišćenja dimnjaka, uslove za vršenje dimnjačarske službe, te druga pitanja od značaja za obavljanje dimnjačarske djelatnosti, te obavljanje nadzora nad radom dimnjačarske službe.

2. Planiranje i provođenje mjera zaštite od požara

Član 24.

Na području Općine planiraju se i provode mjere zaštite od požara, i to:

1. opće mjere za zaštitu od požara;
2. mjere zaštite od požara u oblasti prostornog planiranja;
3. razvrstavanje građevina u odgovarajuće kategorije ugroženosti od požara;
4. sadržaj projektne dokumentacije;
5. izdavanje rješenja o odobrenju za građenje, odnosno za upotrebu građevine;
6. održavanje i ispitivanje aparata za gašenje početnih požara;
7. proizvodnja i promet uređaja, opreme i sredstava namijenjenih za dojavu, gašenje i sprječavanje širenja požara;
8. upotreba, skladištenje i promet zapaljivih, eksplozivnih i drugih opasnih materija;
9. prodaja zapaljivih, eksplozivnih i drugih opasnih materija;
10. zaštita od požara u saobraćaju;
11. zaštita od požara u šumama, na šumskom i poljoprivrednom zemljištu;

12. zaštita od požara prirodnog i kulturno – historijskog naslijeđa;
13. vatrogasno dežurstvo;
14. ispravnost i funkcionalnost uređaja, opreme i sredstava za dojavu i gašenje požara;
15. održavanje u ispravnom stanju i kontrola ispravnosti uređaja za dojavu i gašenje požara;
16. protočni kapacitet i pritisak vode u hidrantskoj mreži;
17. održavanje instalacija;
18. certifikat o usklađenosti opreme, uređaja i drugih sredstava za zaštitu od požara s propisima i standardima;
19. osiguranje od požara;
20. informacijski sistem zaštite od požara;
21. statistička istraživanja iz oblasti zaštite od požara i vatrogastva.

Član 25.

Opće mjere zaštite od požara utvrđene su u članu 27. Zakona, i iste su dužni provoditi svi vlasnici i korisnici građevina i prostora koje koriste u svom radu.

Član 26.

Služba za urbanizam i zaštitu okoliša općine Cazin, osigurat će da se pri izradi dokumenata prostornog plana, urbanističkog plana, regulacionih planova i urbanističkih projekata Općine, predvide prostorne i tehničke mjere zaštite od požara, a naročito mjere predviđene u članu 28. stav 1. Zakona. Uz navedene dokumente izrađuje se i elaborat zaštite od požara u kojem se razrađuju mjere u skladu sa stavom 1. ovog člana.

Član 27.

Vlasnici, korisnici i upravitelji građevina (izuzev građevina individualnog stanovanja) dužni su svaku građevinu, ponaosob, koju koriste, odnosno upravljaju svojim dokumentima: procjenom ugroženosti od požara i planom zaštite od požara svrstati u kategoriju požarne ugroženosti, i starati se o svim propisanim preventivnim mjerama zaštite od požara i eksplozije, u smislu Pravilnika o uslovima, osnovama i kriterijima za razvrstavanje građevina u kategorije ugroženosti od požara („Sl. novine Federacije BiH“, broj: 79/11).

Član 28.

Kod izgradnje, rekonstrukcije i adaptacije pojedinih objekata, bez obzira na njihovu veličinu i namjenu (izuzev građevina individualnog stanovanja), obavezno se izrađuje elaborat zaštite od požara, kao sastavni dio projektne dokumentacije, u skladu sa članom 31. Zakona.

Član 29.

Izvođač radova na građevini u izgradnji dužan je prije početka građenja sačiniti elaborat zaštite od požara na gradilištu i pribaviti saglasnost kantonalne inspekcije zaštite od požara, te osigurati dovoljno sredstava i opreme za gašenje (član 32. stav 2. Zakona).

Član 30.

Korisnici aparata za gašenje početnih požara (pravna i fizička lica koja su po propisima obavezni imati aparat za gašenje početnog požara) dužni su vršiti održavanje aparata prema propisima o tehničkim normativima i standardima koji se odnose na održavanje tih aparata, odnosno najmanje jednom u šest mjeseci (član 39. stav 1. Zakona).

Održavanje i ispitivanje aparata za gašenje početnih požara mogu vršiti samo pravna lica koja su registrirana i ovlaštena za tu djelatnost.

Član 31.

Mjere zaštite od požara u saobraćaju moraju se provoditi za svaku vrstu saobraćaja u cilju sprečavanja nastanka požara ili eksplozije.

Pravna i fizička lica koja se bave poslovima transporta mjere zaštite od požara provodit će u skladu sa propisima za svaku vrstu saobraćaja, kao i mjere zaštite koje propiše svojim općim aktom (pravilnikom).

Član 32.

Zaštitu od požara u šumama, na šumskom i poljoprivrednom zemljištu trebaju organizovati provoditi sva pravna i fizička lica vlasnici ili korisnici šuma i šumskog i poljoprivrednog zemljišta, kao i organi uprave koji su nadležni za šume, šumska i poljoprivredna zemljišta na području Općine u skladu sa propisima koji se odnose na šume, šumska i poljoprivredna zemljišta iz odredbi člana 27. stav 1. tačka 5. Zakona.

Zabranjeno je lažno dojavljivanje požara u šumama, na šumskom ili poljoprivrednom zemljištu, kao i bilo kojoj drugoj pokretnoj ili nepokretnoj imovini.

Pripadnici Vatrogasne jedinice dojave o požaru će primati samo od lica čiji identitet mogu pouzdano utvrditi.

Licu koje lažnom dojavom o požaru prouzrokuje štetu vatrogasnoj jedinici uslijed izlaska na teren bit će izrečena adekvatna kaznena mjera.

Protiv lica koje je namjerno ili nenamjerno izazvalo akcident, a nakon njegove identifikacije, bit će pokrenut odgovarajući sudski postupak.

Član 33.

Tehničke, preventivno – uzgojne i druge mjere zaštite šuma, od požara dužni su provoditi nosioci prava upravljanja šumama i šumskim zemljištem, u cilju smanjenja opasnosti od nastanka i širenja šumskih požara, zatim ranog otkrivanja i dojave šumskog požara, te pravovremenog djelovanja u lokaliziranju i gašenju šumskih požara.

Nosioci prava upravljanja šumama i šumskim zemljištem imaju obavezu da do početka požarne sezone o uočenim nedostacima na prohodnosti protivpožarnih prosjeka i puteva, kao i prohodnosti prosjeka sa elementima šumskog puta za vatrogasna vozila, izvijestiti Službu za civilnu i protivpožarnu zaštitu - Vatrogasnu jedinicu.

Član 34.

Sprovođenje agro-tehničkih mjera zaštite šuma, šumskog i poljoprivrednog zemljišta, od požara, u smislu krčenja, čišćenja i sprječavanja zakorovljenosti,

uništavanje biljnih ostataka i drugog, vršit će se u skladu sa odredbama Zakona o poljoprivrednom zemljištu („Sl. Novine FBiH“, br. 52/09).

Član 35.

Loženjem vatre na otvorenom prostoru u smislu ove Odluke smatra se upotreba vatre izvan zatvorenih odnosno pokrivenih prostora , a posebno:

- spaljivanje suhe trave, korova, biljnog otpada, grmlja, gustog šumskog raslinja (šiblja) i šikara,
- spaljivanje papira, smeća i otpada, improvizirani roštilji,
- logorske vatre i sl.

Član 36.

Zabranjeno je bacanje zapaljenih šibica, opušaka, pirotehničkih i drugih zapaljivih tvari na otvorenim prostorima, osim na mjestima koja utvrdi pravna osoba koja gazduje ili upravlja otvorenim prostorom.

Član 37.

Zabranjeno je loženje vatre na svim otvorenim prostorima u razdoblju od 01.04. do 31.10.

Izuzetno, u razdoblju iz stava 1. ovog člana, mogu se koristiti improvizirani roštilji na okućnicama u naseljenom mjestu, ako je očišćeno mjesto loženja otvorene vatre od svih gorivih tvari u krugu od 1,5 m od ruba roštilja i uz uslov da je pripremljena odgovarajuća količina vode za gašenje ostataka loženja vatre (žar i sl.) i za polijevanje pepela.

Roštilji u vatrootpornom kućištu koji su izrađeni tako da ne postoji mogućnost da se vatra prenese na otvoreni prostor mogu se koristiti u razdoblju iz stava 1. uz uslove da je pripremljen sigurnosni pojas odnosno očišćeno okolno zemljište i da je osigurano priručno sredstvo za gašenje vatre (voda, metlarica, lopata i sl.).

U razdoblju iz stava 1. dozvoljeno je zavarivanje, brušenje i druge radnje koje mogu prouzrokovati iskrenje, odnosno vatru na otvorenom prostoru uz obezbjeđene uslove iz stava 3. ovog člana.

Član 38.

Loženje vatre u smislu odredbe člana 35. ove Odluke, u kritičnim periodima za izbijanje požara na otvorenim prostorima i to: mart - april i oktobar - novembar (periodi kada poljoprivrednici pripremaju i čiste svoje njive), može se obavljati ako je o tome prethodno obaviještena Profesionalna vatrogasna jedinica i ako je od iste dobijena usmena ili pismena saglasnost za loženje vatre na otvorenom prostoru, osim za izletišta i šume za koje odobrenje daje pravna osoba koja upravlja navedenim prostorom u skladu sa svojim općim aktom, u dogovoru sa vatrogasnom jedinicom.

Član 39.

Vatrogasna jedinica će odobriti loženje vatre tražitelju uz uslov da provede odgovarajuće preventivne mjere da se vatra ne proširi na druge površine ili objekte, a naročito:

- spaljivanje tvari mora se obaviti na sigurnoj udaljenosti od drugih površina (npr. šuma i dr.) i objekata (npr. elektroenergetskih vodova, cesta, stambenih kuća, restorana i dr.) koje bi vatra mogla ugroziti,
- oko mjesta spaljivanja pripremiti sigurni pojas (očistiti okolno zemljište), ovisno o količini tvari i veličini površine koja se pali osigurati prisutnost dovoljnog broja osoba sposobnih za gašenje požara,
- uz mjesto spaljivanja osigurati odgovarajuća priručna sredstva za gašenje ostataka vatre (žar i sl.) i proširenje vatre (voda, lopata i sl.),
- spaljivanje provesti ako nije utvrđena velika ili vrlo velika opasnost za nastajanje i širenje požara, te za mirna vremena kada ne puše vjetar jačine 5 m/sek ili više,
- osobe koje su obavile spaljivanje dužne su mjesto spaljivanja pregledati i ostatke vatre (žar i sl.) u potpunosti ugasiti.

Član 40.

Vatrogasna jedinica daje usmeno ili pismeno odobrenje za spaljivanje tvari, ovisno o procjeni opasnosti za nastanak požara, u skladu sa raspoloživim podacima o namjerama loženja vatre na otvorenom prostoru.

Obrazac pisanog odobrenja za loženje vatre na otvorenom prostoru se nalazi u prilogu ove Odluke i čini njen sastavni dio.

Osobe koje obavljaju spaljivanje dužne su pridržavati se preventivnih mjera iz člana 6., a posebno su dužne u potpunosti ugasiti ostatke otvorene vatre.

Član 41.

Vatrogasna jedinica o podnesenim usmenim i pismenim zahtjevima za odobrenje spaljivanja iz člana 38. ove Odluke uredno unosi podatke u odgovarajuće obrazce - evidencije, koje sadrže:

- podatke o tražiocu odobrenja (ime, prezime, datum rođenja, ime oca, adresa stanovanja i broj telefona),
- podatke o vremenu i mjestu spaljivanja,
- naziv i veličinu površine spaljivanja, te opis tvari koja će se spaljivati,
- preventivne mjere koje tražitelj odobrenja namjerava provesti za vrijeme spaljivanja,
- lične podatke o osobama koje će obaviti spaljivanje,
- podatak da li je izdano usmeno ili pismeno odobrenje.

Član 42.

Pravne osobe koje upravljaju i gazduju izletištima, šumama i zemljištem na kojem su smješteni objekti javne i poslovne namjene, te ostalim otvorenim prostorima, obvezni su za razdoblje od aprila do oktobra donijeti i provoditi preventivno-operativne planove aktivnosti nadzora, čuvanja i druge mjere zaštite od požara, te istim planovima osigurati pravovremenu dojavu podataka nadležnim službama u svrhu otklanjanja opasnosti od požara.

Obveza iz stava 1. ovog člana, primjenjuje se i u razdoblju velike i vrlo velike opasnosti za nastajanje i širenje požara koje utvrđuju nadležne institucije, koje podatke o utvrđenom indeksu opasnosti (mala, umjerena, velika i vrlo velika opasnost) dostavljaju operativnom centru civilne zaštite i profesionalnoj vatrogasnoj jedinici, za svaki pojedinačni slučaj.

Služba za civilnu i protivpožarnu zaštitu dužna je redovno obavještavati građane o postojanju opasnosti za nastajanje i širenje požara putem sredstava javnog informisanja.

Član 43.

U cilju educiranja građana i školske djece za što bolju preventivnu zaštitu od požara, tokom mjeseca maja i oktobra Služba za civilnu zaštitu – Vatrogasna jedinica, će planirati aktivnosti edukativnog karaktera.

Član 44.

Pred žetvu, za vrijeme žetve i vršidbe, kao i spremanja stočne hrane vlasnici parcela i izvođači poljoprivrednih radova, obavezni su poduzeti posebne mjere zaštite od požara i to:

- nedozvoliti loženje vatre na otvorenom,
- obezbjediti sredstva za gašenje požara na mjestu gdje se obavljaju ratarski radovi,
- učiniti protivpožarne prepreke (preoravanje) strmih zemljišta nakon žetve,
- po potrebi organizirati dežurstvo.

Član 45.

Uređaji za vršidbu (kombajni i vršilice) moraju biti tehnički ispravni i opremljeni sa najmanje jednim S-9 aparatom za gašenje požara.

Osim toga, na mjestu vršidbe mora se obezbjediti: posuda sa 200 litara vode, jedna kanta, dvije lopate, jedan kramp, jedne vile i jedna čaklja.

Član 46.

Stočna hrana (plastovi sijena, slame, vreće žita i sl.) ne smiju se uskladištiti bliže od 15 metara od objekta u kojem se loži vatra, električnih vodova i javnih puteva, a od drugih objekata najmanje 20 m.

Veća skladišta stočne hrane moraju biti udaljena od navedenih objekata najmanje 50 m.

Član 47.

U cilju sprječavanja nastanka požara, zaštite života i zdravlja ljudi i sprječavanja uništenja materijalnih dobara na području općine Cazin, vatrogasno dežurstvo se organizuje i provodi u situacijama navedenim u članu 46. stav 1. tačka 1. do 4. Zakona.

Vatrogasno dežurstvo iz stava 1. ovog člana se organizuje i provodi u uslovima povećane požarne opasnosti u slijedećim situacijama:

- 1) na mjestima u kojima se privremeno skladište zapaljive tečnosti i plinovi u količini do 5 m³ (magazini i slični prostori), što organizuje vlasnik ili korisnik građevine;
- 2) na privremenim mjestima, koja nisu za to predviđena, na kojima se izvode radovi zavarivanja, rezanja i lemljenja, se mogu obavljati u skladu sa Pravilnikom o mjerama zaštite od požara pri izvođenju radova zavarivanja, rezanja i lemljenja („Sl. novine F BiH“, broj: 65/10) što organizuje izvođač tih radova;
- 3) na mjestima i prostorima gdje se očekuje okupljanje većeg broja ljudi (više od 50) zbog održavanja manifestacije (sportske, privredne, zabavne, političke i druge manifestacije), što organizuju organizatori tih manifestacija. Organizatori tih manifestacija moraju izraditi dva dokumenta:
 - plan preventivnog osiguranja,
 - plan evakuacije, sva vrata na putevima evakuacije moraju biti otključana, a putevi evakuacije prohodni.
- 4) na područjima na kojima se nalaze šume, šumsko i poljoprivredno zemljište, koja su klasificirana u I i II kategoriju stepena ugroženosti od požara, vatrogasno dežurstvo i posmatračko – dojavnu službu dužni su organizovati vlasnici i korisnici šuma, šumskog i poljoprivrednog zemljišta;

Vatrogasno dežurstvo u svim situacijama iz stava 2. ovog člana mora trajati sve dok traje potreba zbog koje je dežurstvo i određeno.

Član 48.

Vatrogasno dežurstvo se može organizovati na dva načina:

- da vlasnik ili korisnik objekta i prostora to dežurstvo organizira samostalno, u vlastitoj režiji (samostalno ili vlastito dežurstvo),
- da se za organizovanje i provođenje vatrogasnog dežurstva angažira pravno lice ili agencija koja se profesionalno bavi tim poslom (zaključivanjem pismenog ugovora).

Član 49.

Vatrogasno dežurstvo mogu vršiti samo slijedeća lica:

- profesionalni vatrogasci,
- dobrovoljni vatrogasci,
- druga lica koja su osposobljena za zaštitu od požara, i koja su položila ispit za zaštitu od požara na način predviđen u odredbi stava 6. člana 128. Zakona.

Član 50.

Vlasnik ili korisnik građevine mora prije početka upotrebe ugrađenog sistema aktivne zaštite od požara (sistem za dojavu požara i sistem za gašenje požara), obavezno pribaviti potvrdu o ispravnosti i funkcionalnosti sistema.

Član 51.

Vlasnik ili korisnik građevine u kojoj je ugrađen sistem za dojavu i gašenje požara i drugi protivpožarni uređaji dužan je osigurati redovno ispitivanje ispravnosti i funkcionalnosti istih prema Zakonu, tehničkim propisima i uputama proizvođača uređaja, opreme i sredstava za dojavu i gašenje požara, a najmanje dva puta godišnje, o čemu mora voditi evidenciju i posjedovati dokumentaciju.

Član 52.

JKP „Vodovod“ Cazin, kao upravitelj vodovodnom, odnosno hidrantskom mrežom, dužno je da prilikom izgradnje, rekonstrukcije i korištenja tih mreža na području općine Cazin, za zaštitu naseljenih mjesta, vanjskom hidrantskom mrežom za gašenje požara, osigurati najmanje protočnu količinu vode od 600 l/min., a za zaštitu građevine i/ili prostora vanjskom hidrantskom mrežom za gašenje požara, ovisno o požarnom opterećenju i površini objekta, prema proračunu potrebne količine vode u skladu sa tabelom 2. iz člana 32. Pravilnika o tehničkim normativima za vanjsku i unutrašnju hidrantsku mrežu za gašenje požara („Sl. novine FBiH“, broj: 87/11) i najmanji pritisak na izlazu nadzemnog ili podzemnog hidranta vanjske hidrantske mreže za gašenje požara od 0,25 MPa, kod propisnog protoka vode.

Tehnička ispravnost hidrantske mreže mora se permanentno provjeravati u periodu od svakih 6 mjeseci.

Član 53.

JKP „Vodovod“ Cazin je obavezno:

- redovno vršiti provjeravanje i održavanje javne, vanjske hidrantske mreže, o čemu vodi odgovarajuću evidenciju,
- da vrši označavanje hidranata,
- da redovno, o svim promjenama, izvještava Vatrogasnu jedinicu Općine Cazin.

Član 54.

Vlasnici građevina i prostora i upravitelji stambenih objekata u kojima je ugrađena unutrašnja i vanjska hidrantska mreža dužni su je stalno održavati u ispravnom stanju u skladu sa Pravilnikom o tehničkim normativima za vanjsku i unutrašnju hidrantsku mrežu za gašenje požara („Sl. novine FBiH“, broj: 87/11).

Vlasnici građevina i prostora i upravitelji stambenih objekata imaju slijedeće obaveze:

- da hidrantsku mrežu (unutrašnju i vanjsku) u građevini stalno održavaju u ispravnom stanju,

- da svakih 6 mjeseci obavezno izvrše kontrolu hidrantske mreže od strane ovlaštenih stručnih i pravnih lica za vršenje tih poslova, uz dostavljanje odgovarajućeg zapisnika,
- da vode evidenciju o izvršenim pregledima hidrantskih mreža,
- da posjeduju dokumentaciju kojom je potvrđena ispravnost hidrantskih mreža.

Član 55.

Ugovor o osiguranju od požara i eksplozija može se zaključiti samo za one građevine za koje je Služba za urbanizam i zaštitu okoliša, općine Cazin, izdala upotrebnu dozvolu.

Osiguranik požarnog rizika koji koristi građevine i prostore u kojima može nastati požar ili koji olakšavaju njegovo širenje i objekti sa posebnim rizičnim požarnim opterećenjem, mora se osigurati od odgovornosti za štetu koju može nanijeti trećim licima, Općini i bližim i daljim susjedima (odgovornost iz djelatnosti).

Član 56.

Funkcionalni dio informacionog sistema zaštite od požara i vatrogastva organizira se i funkcionira u Službi za civilnu i protivpožarnu zaštitu – u okviru Operativnog centra civilne zaštite.

Pravna lica, državni organi i druge institucije i građani dužni su Operativnom centru civilne zaštite dostavljati podatke o događajima koji se odnose na pojave požara i drugih vrsta prirodnih i drugih nesreća.

Član 57.

Statistička istraživanja iz oblasti zaštite od požara i vatrogastva u Jedinstvenom općinskom organu uprave općine Cazin organizuje i vodi Služba za civilnu i protivpožarnu zaštitu – Vatrogasna jedinica.

V - ORGANIZACIJA I FUNKCIONISANJE VATROGASTVA

1. Vatrogasna djelatnost

Član 58.

Vatrogasnu djelatnost na području općine Cazin obavljaju Profesionalna vatrogasna jedinica, dobrovoljne vatrogasne jedinice, vatrogasna društva i vatrogasni savezi, u skladu sa nadležnostima koje su utvrđene Zakonom i drugim propisima iz člana 3. ove Odluke.

Član 59.

Osnovni nosilac organizovanja, pripremanja i provođenja vatrogasne djelatnosti na području općine je Općina, odnosno Jedinstveni općinski organ uprave, što se ostvaruje na način predviđen Zakonom.

2. Vatrogasne snage

Član 60.

Struktura vatrogasnih snaga na području Općine utvrđuje se u skladu sa Procjenom ugroženosti od požara teritorija općine Cazin, kadrovskim, materijalnim i drugim uslovima Općine i organiziraju se i raspoređuju na području Općine tako da zadovolje slijedeće zadatke u zaštiti od požara:

1. potpunu pokrivenost cijelog područja Općine;
2. zahtjeve specifičnih vatrogasnih intervencija u objektima stambene i industrijske izgradnje, kao i na prostorima i lokalitetima zaštićenog prirodnog i kulturno – historijskog naslijeđa;
3. gašenje šumskih i drugih požara na otvorenom prostoru;
4. potrebe vatrogasnih intervencija u cestovnom, željezničkom, riječnom, i vazdušnom saobraćaju;
5. efikasno spašavanje ljudi i materijalnih dobara ugroženih požarom ili eksplozijama.

Član 61.

Snage za obavljanje vatrogasne djelatnosti na području Općine su:

- a) osnovna snaga je Profesionalna vatrogasna jedinica koju čine vatrogasci koji se nalaze u radnom odnosu u Službi za civilnu i protivpožarnu zaštitu općine Cazin;
- b) dopunske snage za vatrogastvo na području općine Cazin su:
 - dobrovoljne vatrogasne jedinice koje osnivaju dobrovoljna vatrogasna društva,
 - vatrogasne jedinice pravnih lica,
- c) snage koje djeluju u toku izvođenja vatrogasne intervencije, a prema potrebi i u drugim situacijama, i to :
 - jedinice civilne zaštite,
 - službe zaštite i spašavanja,
 - općinski štab civilne zaštite,
 - povjerenici civilne zaštite,
- d) operativni centar civilne zaštite Općine osigurava komunikacijsko - informacijsku podršku općinskom štabu civilne zaštite i drugim organima koji rukovode akcijama zaštite na području ugroženom od požara.

Član 62.

Osnivanje Profesionalne vatrogasne jedinice, njena veličina i razmještaj na području, vrši se u skladu sa procjenom ugroženosti od požara područja općine Cazin i u skladu sa kadrovskim, materijalnim i drugim uslovima i potrebama za efikasno funkcionisanje jedinice.

Osnivanje i razmještaj profesionalne vatrogasne jedinice na području Općine vrši se tako da ta jedinica može u svakom trenutku i u svim uslovima osigurati blagovremeno i efikasno gašenje požara na cijelom području Općine i spasiti ljude i materijalna dobra koja su ugrožena požarom ili eksplozijom.

Za poduzimanje odgovarajućih mjera i aktivnosti na organizaciji i provođenju zaštite od požara i vatrogastva na području Općine u skladu sa Zakonom o zaštiti od požara i vatrogastvu i ovom Odlukom u Službi za civilnu i protivpožarnu zaštitu osniva se unutrašnja organizaciona jedinica za zaštitu od požara - Odsjek za zaštitu od požara – Profesionalna vatrogasna jedinica, formacijskog ranga **vod**.

Vatrogasne jedinice obavljaju vatrogasnu djelatnost prema pravilima struke, na području za koje su osnovane, bez obzira čiji su ljudski životi i materijalna dobra ugroženi požarom ili eksplozijom.

Svaka vatrogasna jedinica iz stava 1. ovog člana, obavezna je učestvovati u vatrogasnoj intervenciji i izvan područja svog djelovanja po naredbi Službe za civilnu i protivpožarnu zaštitu Općine, odnosno Štaba civilne zaštite Općine, što se vrši u uslovima utvrđenim u članu 94. i 96. Zakona.

Član 63.

Dobrovoljna vatrogasna društva osnivaju se i prestaju sa radom, u skladu sa Zakonom o udruženjima i fondacijama („Sl. novine Federacije BiH“, broj: 45/02 i 85/07) i djeluju kao udruženja građana, a u odnosu na vatrogasnu djelatnost postupaju u skladu sa odredbama člana 81. do 85. Zakona o zaštiti od požara i vatrogastvu.

Ako je internim aktom DVD-a (Statutom) regulisano da Dobrovoljna vatrogasna jedinica, iz sastava DVD-a, može samoinicijativno učestvovati u gašenju požara i drugim intervencijama, obaveza je da isto osigura sve pripadnike, kod neke od osiguravajućih kuća, koji se mogu i planiraju angažovati.

Dobrovoljnom vatrogasnom društvu, osnovanom u saradnji, i uz pomoć Službe za civilnu i protivpožarnu zaštitu Općine po ukazanoj potrebi za formiranjem dobrovoljne vatrogasne jedinice na osnovu procjene ugroženosti od požara Općine i plana zaštite od požara Općine, finansijska i druga sredstva potrebna za rad te vatrogasne jedinice osigurava Općina.

Član 64.

U planu zaštite od požara općine Cazin određuju se pravna lica koja su dužna osnovati vatrogasnu jedinicu ili na drugi način osigurati zaštitu od požara (član 88. stav 1. Zakona).

Pravna lica u kojima se proizvode, prerađuju, distribuiraju ili skladište zapaljive, eksplozivne i ostale opasne materije, u kojima zbog toga postoji povećana opasnost od požara ili eksplozija (prema propisu iz člana 29. stav 2. Zakona) dužna su osnovati vatrogasnu jedinicu ili na drugi način osigurati zaštitu od požara.

Pravna lica koja nisu obuhvaćena stavom 2. ovog člana, samostalno odlučuju o potrebi osnivanja vatrogasne jedinice za svoje potrebe što vrši u skladu sa svojom procjenom ugroženosti od požara i potrebama zaštite i spašavanja ljudi i materijalnih dobara pravnog lica.

VI – GAŠENJE POŽARA – VATROGASNE INTERVENCIJE

Član 65.

Svaki građanin koji primijeti požar dužan je da ga ugasi, ako to može učiniti bez opasnosti za sebe i druge.

Ukoliko građanin nije u mogućnosti da ugasi požar, dužan je da o požaru odmah obavijesti najbližu vatrogasnu jedinicu ili operativni centar civilne zaštite, odnosno policijsku stanicu.

Pravna lica, državni organi i druge institucije u kojima dođe do požara ili kad saznaju za požar, dužna su pristupiti gašenju požara i istovremeno o tome odmah obavijestiti najbližu vatrogasnu jedinicu, operativni centar civilne zaštite ili policijsku stanicu.

Pravna lica, državni organi, druge institucije i građani, dužni su, pod uslovima i na način propisan Zakonom, ovom Odlukom i drugim propisima, učestvovati u pomaganju gašenju požara i spašavanju ljudi i materijalnih dobara ugroženih požarom i staviti na raspolaganje svoj alat, prijevozna, tehnička i druga sredstva potrebna za gašenje požara, spašavanje ljudi i materijalnih dobara ugroženih požarom, koje naredi nadležni štab civilne zaštite.

Redoslijed angažovanja snaga i sredstava za gašenje požara vrši se, u smislu člana 91. stav 2. Zakona, u tri faze:

- u prvoj fazi, angažuje se Vatrogasna jedinica općine Cazin, dobrovoljne vatrogasne jedinice i vatrogasne jedinice pravnih lica formirane u Općini,
- u drugoj fazi, vrši se angažovanje snaga i sredstava civilne zaštite, odnosno službi zaštite i spašavanja koje su formirane u Općini.
- u trećoj fazi, angažuju se snage i sredstva pravnih lica, državnih organa i drugih institucija i građana.

O angažovanju snaga i sredstava u prvoj i drugoj fazi odlučuje Pomoćnik načelnika za civilnu i protivpožarnu zaštitu s tim da aktiviranjem snaga u drugoj fazi istovremeno vrši aktiviranje Općinskog štaba civilne zaštite radi rukovođenja akcijama zaštite i spašavanja i odlučivanja o angažovanju odgovarajućih snaga i sredstava na gašenju požara (član 94. stav 2. Zakona).

Po aktiviranju Općinskog štaba civilne zaštite, štab civilne zaštite preuzima sva ovlaštenja na odlučivanju, rukovođenju i upravljanju aktivnostima na gašenju požara i spašavanju ugroženih ljudi i materijalnih dobara (član 95. Zakona).

Član 66.

Općinski štab civilne zaštite se aktivira kada Pomoćnik načelnika Službe za civilnu i protivpožarnu zaštitu ocijeni da, pored angažiranih vatrogasnih jedinica ima potrebe da se angažiraju snage i sredstva civilne zaštite, službi zaštite i spašavanja, pravnih lica, državnih organa, drugih institucija i građana (član 94. stav 2. Zakona).

Član 67.

Profesionalna vatrogasna jedinica Općine čim dobije dojavu o pojavi požara na njenom području, starješina ili drugo ovlašteno lice iz jedinice dužan je odmah, samoinicijativno, organizovati izlazak jedinice na mjesto požara i pristupiti njegovom gašenju i spašavanju ljudi i materijalnih dobara ugroženih požarom, bez obzira na to o čijim se ljudskim životima i materijalnim dobrima radi.

Član 68.

Akcijom gašenja požara odnosno vatrogasnom intervencijom, na području Općine, rukovodi rukovodilac akcije gašenja požara čija je jedinica prva počela gasiti požar.

Kada na mjestu intervencije prva počne da interveniše dobrovoljna vatrogasna jedinica vatrogasnog društva, ili pravnog lica, akcijom rukovodi rukovodilac akcije gašenja požara te jedinice do dolaska profesionalne vatrogasne jedinice, kada rukovođenje intervencijom preuzima rukovodilac akcije gašenja požara profesionalne vatrogasne jedinice.

Član 69.

Ako starješina vatrogasne jedinice koji rukovodi akcijom gašenja požara iz člana 68. ove Odluke, ocijeni da angažiranom jedinicom, sredstvima i opremom, nije u mogućnosti uspješno završiti intervenciju, o tome odmah izvještava Pomoćnika načelnika Službe za civilnu i protivpožarnu zaštitu Općine.

Pomoćnik načelnika iz stava 1. ovog člana dužan je odmah, na osnovu raspoloživih podataka, odlučiti o angažovanju:

1. profesionalne vatrogasne jedinice Općine i dobrovoljnih vatrogasnih jedinica sa područja Općine na gašenju požara koje nisu angažirane na gašenju požara,
2. narediti angažovanje odgovarajućih snaga civilne zaštite koje je organizovala Općina, kada nisu dovoljne snage iz tačke 1. ovog stava,
3. istovremeno, sa aktivnostima iz tačke 2. ovog stava, vrši aktiviranje Općinskog štaba civilne zaštite radi rukovođenja akcijama zaštite i spašavanja na području ugroženom požarom i odlučivanja o angažovanju odgovarajućih snaga i sredstava na gašenju požara, što Štab vrši prema članu 70. ove Odluke.

Član 70.

U uslovima iz člana 69. stav 2. tačka 2. i 3. ove Odluke, Općinski štab civilne zaštite ovlašten je da poduzme slijedeće mjere:

1. narediti svim vatrogasnim jedinicama (profesionalnim i dobrovoljnim jedinicama i jedinicama pravnih lica), kao i svim jedinicama i povjerenicima civilne zaštite i službama zaštite i spašavanja i službama zaštite od požara, koje pripadaju Općini, učešće u gašenju požara i spašavanju ugroženih ljudi i materijalnih dobara;
 2. narediti pravnim licima, državnim organima, drugim institucijama, samostalnim radnjama i građanima da stave na raspolaganje alat, prijevozna, tehnička i druga sredstva potrebna za gašenje požara i za spašavanje ljudi i materijalnih dobara ugroženih požarom, kao i njihovo učešće u gašenju požara;
 3. narediti svim psiho-fizički sposobnim građanima sa područja Općine, starijim od 18 godina, da učestvuju u obavljanju pomoćnih poslova na gašenju požara i spašavanju ljudi i materijalnih dobara ugroženih požarom;
 4. narediti evakuaciju stanovništva i materijalnih dobara sa ugroženog područja.
- Vatrogasne jedinice, pravna lica, državni organi, druge institucije i samostalne radnje i građani dužni su postupiti po naredbi Općinskog štaba civilne zaštite, koja je donesena prema stavu 1. ovog člana.

Član 71.

Ako se gašenje požara ne može efikasno izvršiti snagama i sredstvima sa područja Općine, koja su angažovana na osnovu članova 68. i 69. ove Odluke, pa je potrebna pomoć Kantona, u tom slučaju komandant Općinskog štaba civilne zaštite traži pomoć od Kantonalne uprave civilne zaštite.

Ukoliko dođe do aktiviranja Kantonalnog štaba civilne zaštite, realizaciju mjera koje naredi Kantonalni štab civilne zaštite provode starješine vatrogasnih jedinica, državni organi i pravna lica na koja se naredba štaba odnosi, a koordinaciju predviđenih aktivnosti osigurava član Kantonalnog štaba civilne zaštite zadužen za zaštitu od požara i vatrogastvo.

Član 72.

Vatrogasne jedinice, pravna lica, državni organi i druge institucije i građani dužni su postupiti po naredbi Pomoćnika načelnika Službe za civilnu i protivpožarnu zaštitu, odnosno Općinskog štaba civilne zaštite iz člana 69. ove Odluke, u odnosu na mjere koje budu utvrđene u toj naredbi o njihovom angažovanju na gašenju požara i spašavanju ljudi i materijalnih dobara na ugroženom području.

U uslovima iz člana 94. i 96. Zakona, aktivirani štabovi civilne zaštite koriste svoja ovlaštenja iz člana 95. Zakona, kao i sva druga ovlaštenja koja su za Štab civilne zaštite utvrđena u Zakonu o zaštiti i spašavanju ljudi i materijalnih dobara od prirodnih i drugih nesreća i funkcionišu sve dok se ne završi vatrogasna intervencija.

Starješine vatrogasnih jedinica koje su, prema članu 69. i 71. ove Odluke, angažovane na gašenju požara, dužne su postupiti po naredbama organa uprave civilne zaštite, odnosno štaba civilne zaštite, koje su donesene na osnovu tih odredbi i osigurati provođenje tih naredbi na terenu, koje se odnose na te jedinice.

Član 73.

Kod gašenja požara u šumama, na šumskom i poljoprivrednom zemljištu, na zaštićenim područjima i objektima i u drugim slučajevima kada je potrebno posebno stručno poznavanje tehnoloških postupaka i opasnosti u vezi sa tim postupcima (minirana i druga područja), rukovodilac akcije gašenja požara dužan je ostvariti saradnju sa licem koje je stručno za taj tehnološki postupak i tako postići sigurnost i uspješno gašenje požara, s tim da se gašenje požara u šumama i na šumskom zemljištu vrši na način predviđen Zakonom o šumama i propisima donesenim na osnovu tog zakona.

Član 74.

Radi efikasnijeg i nesmetanog gašenja požara i spašavanja ljudi i materijalnih dobara ugroženih požarom ili eksplozijom, rukovodilac akcije gašenja požara u obavljanju vatrogasne intervencije ima ovlaštenja, utvrđena članom 99. Zakona, i to:

- 1) zabraniti pristup nepozvanim licima u blizini mjesta intervencije, kao i zaustaviti saobraćaj pored tog mjesta;
- 2) pozvati policiju u cilju osiguranja mjesta događaja te poduzimati druge potrebne mjere radi spriječavanja nastanka štetnih posljedica;

- 3) narediti evakuaciju ljudi i uklanjanje materijalnih dobara iz susjednih objekata koji su ugroženi, kao i odgovarajuće mjere za sigurnost ljudi i materijalnih dobara koja se evakuiraju;
- 4) narediti prekid dovođenja električne energije i gasa;
- 5) narediti djelomično ili potpuno rušenje objekta preko kojeg bi se požar mogao proširiti, ako se širenje požara ne može na drugi način spriječiti;
- 6) ograničiti djelomično ili potpuno dovod vode drugim potrošačima u zoni u kojoj se gasi požar ili u čitavom naselju radi osiguranja potrebne količine vode za gašenje požara;
- 7) narediti korištenje vode iz obližnjeg bunara, cisterni, rezervoara i sl. koji pripadaju pravnim licima, državnim organima, samostalnim radnjama i pojedincima;
- 8) narediti korištenje vozila pravnih lica, državnih organa, samostalnih radnji i pojedinaca radi prevoženja nastradalih ljudi do najbliže zdravstvene ustanove;
- 9) nasilno otvoriti zaključani objekat ili prostoriju zahvaćenu požarom radi gašenja požara, spašavanja ljudi i materijalnih dobara i radi otklanjanja drugih opasnosti za ljude i materijalna dobra;
- 10) narediti licima koja stanuju u neposrednoj blizini intervencije, kao i licima koja se zateku na mjestu intervencije, da pruže pomoć u intervenciji;
- 11) nasilno otvoriti zaključani objekat ili prostoriju koji nije zahvaćen požarom, ako doprinosi uspješnosti vatrogasne intervencije.

Mjere iz stava 1. ovog člana naređuju se rješenjem koje donosi rukovodilac akcije gašenja požara, s tim da te mjere može narediti i inspektor za vatrogastvo iz članova 146. i 148. Zakona, kao i inspektor za zaštitu od požara iz člana 151. stav 3. Zakona.

Izuzetno, mjere iz stava 1. ovog člana, mogu se narediti i usmeno, ako je neophodno hitno provođenje tih mjera, s tim da se pisano rješenje mora izdati u roku od 24 sata.

Žalba izjavljena na rješenje iz stavova 2. i 3. ovog člana, ne odlaže izvršenje rješenja.

Pravna lica, državni organi, druge institucije i građani dužni su postupiti po rješenju rukovodioca akcije gašenja požara, odnosno rješenju inspektora iz stavova 2. i 3. ovog člana.

Član 75.

Rukovodioci akcije gašenja požara iz člana 94. Zakona odgovorni su za uspješno vođenje intervencije i čuvanje požarišta od ponovnog aktiviranja i dužni su sačuvati tragove i predmete koji mogu poslužiti za utvrđivanje uzroka nastanka požara i osigurati mjesto požara do dolaska inspektora zaštite od požara ili inspektora za vatrogastvo, odnosno policije.

Vlasnici ili upravitelji šuma, šumskog i poljoprivrednog zemljišta dužni su nakon lokaliziranja požara, na zahtjev i po naređenju rukovodioca akcije gašenja požara da osiguraju nadzor nad požarištem, u cilju sprečavanja ponovnog aktiviranja prethodno nastalog požara, sve dok postoje realne opasnosti od istog.

VII – PRAVA ZA UČEŠĆE U VATROGASNOJ INTERVENCIJI

Član 76.

Pored dužnosti koje su navedene u članu 58. ove Odluke, pravna lica, državni organi, druge institucije, lica u radnom odnosu, lica koja samostalno obavljaju djelatnost i građani, odnosno nezaposlena lica imaju i prava za vrijeme učešća u vatrogasnoj intervenciji, u skladu sa Zakonom utvrđenim uslovima.

Za vrijeme angažovanja na vatrogasnim intervencijama, prema naredbama nadležnog štaba civilne zaštite, građani i pravna lica, u skladu sa Zakonom, ostvaruju slijedeća prava:

- 1) pravo na jednokratnu novčanu pomoć za slučaj nastanka tjelesnog oštećenja od najmanje 20 % kao posljedica povrede ili oboljenja;
- 2) pravo na troškove prijevoza, smještaja i ishrane;
- 3) pravo na naknadu za svoju uništenu ili oštećenu odjeću i obuću;
- 4) prava iz penzijskog, invalidskog i zdravstvenog osiguranja;
- 5) članovi porodice na pravo iz penzijskog, invalidskog i zdravstvenog osiguranja za slučaj kada je građanin izgubio život kao neposredna posljedica vršenja zadataka na gašenju požara i spašavanja po osnovu povrede na radu;
- 6) članovi porodice pravo na troškove sahrane kada građanin izgubi život kao neposredna posljedica vršenja zadataka na gašenju požara i spašavanja po osnovu povrede na radu;
- 7) lica u radnom odnosu, kao i lica koja samostalno obavljaju djelatnost, odnosno nezaposleno lice pravo na novčanu naknadu;
- 8) pravna lica, državni organi, druge institucije i građani na naknadu štete koja nastane uništenjem ili oštećenjem alata, prijevoznih, tehničkih i drugih sredstava koja su dali na korištenje u akcijama gašenja požara i spašavanja;
- 9) pravnim licima, državnim organima, drugim institucijama i građanima pripada naknada štete koja nastane na njihovim materijalnim dobrima koja se koriste u gašenju požara na osnovu naredbi koje se donose na osnovu člana 99. stav 1. tačke 5. 7. 8. 9. i 11. i člana 101. Zakona, osim ako je korištenje materijalnih dobara vršeno radi gašenja požara na njihovim objektima i materijalnim dobrima.

Lica iz prethodnog stava navedena prava ostvaruju u skladu sa odredbama Zakona, podzakonskim propisima i ovom Odlukom.

Naknadu iz ovog člana isplaćuje Općina, na osnovu rješenja o isplati za utvrđeno pravo za naknadu, u skladu sa Zakonom, kojeg donosi Općinski načelnik na prijedlog Službe za civilnu i protivpožarnu zaštitu Općine.

VIII – STRUČNO OSPOSBLJAVANJE I USAVRŠAVANJE ZAPOSLENIH LICA ZA ZAŠTITU OD POŽARA I VATROGASTVA

Član 77.

Pravna lica, državni organi i druge institucije dužni su kontinuirano organizovati i provoditi stručno osposobljavanje i usavršavanje svojih zaposlenika, odnosno državnih službenika i namještenika (u daljem tekstu: zaposlena lica), koji se nalaze u radnom odnosu za provođenje mjera zaštite od požara na radnim mjestima na kojima se nalaze.

Obuka i osposobljavanje obuhvata upoznavanje zaposlenih lica sa svim izvorima opasnosti i načinu provođenja mjera zaštite od požara utvrđenih u općem aktu iz člana 21. ove Odluke.

Pored obuke iz stava 1. ovog člana obavezno je, najmanje jednom u dvije godine izvršiti obuku i provjeru znanja iz oblasti zaštite od požara svih zaposlenih lica prema posebnom programu obuke i sadržaju programa i načinu polaganja ispita koji utvrđuje Federalna uprava civilne zaštite.

Stručno osposobljavanje zaposlenih lica iz ovog člana vrši se u skladu sa Programom obuke uposlenika u pravnim osobama, državnim tijelima i drugim institucijama u oblasti zaštite od požara („Službene novine FBiH“, broj: 59/10).

Član 78.

Svi vatrogasci Profesionalne vatrogasne jedinice općine Cazin podliježu obavezi stalnog stručnog osposobljavanja i usavršavanja.

Stručno osposobljavanje, uvježbavanje i kondicioniranje profesionalnih vatrogasaca Profesionalne vatrogasne jedinice mora biti stalna aktivnost radi održavanja i usavršavanja njihove spremnosti za vršenje operativnih poslova gašenja požara i spašavanja ljudi i materijalnih dobara ugroženih požarom i eksplozijom i pružanju pomoći u akcidentnim situacijama.

Organizovanje obuke u skladu sa Programom stručnog osposobljavanja i usavršavanja profesionalnih vatrogasaca Profesionalne vatrogasne jedinice, kojeg na prijedlog Službe civilne zaštite i zaštite od požara donosi Općinski načelnik, provodi starješina jedinice – komandir vatrogasne jedinice.

Član 79.

Svi dobrovoljni vatrogasci podliježu obavezi stručnog osposobljavanja i usavršavanja i polaganja stručnog ispita iz oblasti vatrogasne djelatnosti (ispit za dobrovoljnog vatrogasca), po Programu obuke uposlenika u pravnim osobama, državnim tijelima i drugim institucijama u oblasti zaštite od požara („Službene novine F BiH“, broj: 59/10).

Obuku i osposobljavanje prema programu iz stava 1. ovog člana, kao i polaganje stručnog ispita za dobrovoljne vatrogasce, provodi Kantonalna uprava civilne zaštite i osigurava financijska sredstva za te poslove.

Stručni ispit iz oblasti vatrogastva, prema programu iz stava 2. ovog člana, polažu i lica koja obavljaju poslove portira, odnosno recepcionara u pravnim licima, državnim organima i drugim institucijama.

IX – FINANCIRANJE ZAŠTITE OD POŽARA I VATROGASTVA

Član 80.

Financijska sredstva potrebna za organizovanje, provođenje i unapređenje mjera zaštite od požara predviđenih ovom Odlukom, kao i obučavanje i osposobljavanje zaposlenih lica planiraju i osiguravaju pravna lica, državni organi i druge institucije, svaki za svoje građevine, prostore i zaposlena lica.

Financijska sredstva za potrebe iz stava 1. ovog člana, planiraju se svake godine u okviru financijskog plana koji se odnosi na financiranje njihove osnovne djelatnosti.

Član 81.

Vatrogasna djelatnost predviđena ovom Odlukom financira se iz:

- 1) budžeta Općine,
- 2) sredstava pravnih lica i vatrogasnih društava,
- 3) premija osiguranja,
- 4) dobrovoljnih priloga ili poklona pravnih i fizičkih lica,
- 5) međunarodne pomoći,
- 6) drugih izvora utvrđenih Zakonom o zaštiti od požara i vatrogastvu i drugim zakonom.

Član 82.

Općina financira:

1. obavljanje poslova zaštite od požara i vatrogastva iz članova 9. do 15. ove Odluke, koji su u nadležnosti Općine i Službe civilne zaštite Općine;
2. organizovanje, pripremanje, materijalno opremanje i stručnu obuku i osposobljavanje Profesionalne vatrogasne jedinice koju osniva Općina;
3. učešće u saniranju posljedica na području Općine koje nastanu požarom ili eksplozijom radi stvaranja neophodnih uslova za život ljudi na nastradalom području od požara, u skladu sa materijalnim mogućnostima Općine;
4. pružanje pomoći dobrovoljnim vatrogasnim društvima osnovanim na području općine i grada za financiranje određenih poslova iz njihove nadležnosti od značaja za zaštitu od požara i vatrogastvo, a posebno za financiranje dobrovoljnih vatrogasnih jedinica osnovanih u tim društvima;
5. naknade, plaće i druge naknade predviđene Zakonom za građane i lica u radnom odnosu za njihovo učešće u gašenju požara, kao i naknade za korištenje njihovih prijevoznih, tehničkih i drugih sredstava i opreme koja se koristi u gašenju požara, po naredbi Općinskog štaba civilne zaštite;
6. druge potrebe u oblasti zaštite od požara i vatrogasne djelatnosti iz nadležnosti Općine.

Financijska sredstva za financiranje zadataka iz stava 1. ovog člana, planiraju se i osiguravaju u budžetu Općine, na prijedlog Službe za civilnu i protivpožarnu zaštitu Općine.

Član 83.

Sredstva koja Društva za osiguranje i druga pravna lica, koja se bave osiguranjem imovine pravnih i fizičkih lica, izdvoje iz premije osiguranja imovine od požara i prirodnih sila u iznosu od 6%, a 1% sredstava od naplaćene funkcionalne premije osiguranja, koja se odnosi na osiguranje motornih vozila i u dijelu koji je prihod Općine vode se na posebnom jedinstvenom transakcijskom računu budžeta Općine, s tim da se 6 % od tih sredstava raspoređuje za dobrovoljne vatrogasne jedinice formirane u dobrovoljnim vatrogasnim društvima u Općini, u kojoj su ta sredstva ostvarena.

Sredstva na transakcijskom računu iz stava 1. ovog člana, koja nisu potrošena ne gase se istekom kalendarske (fiskalne) godine, već se akumuliraju sa sredstvima koja se prikupljaju u toku naredne godine.

Sredstva iz stava 1. ovog člana mogu se koristiti samo za nabavku vatrogasne opreme, tehničkih i drugih sredstava za vatrogasne jedinice, stručno obučavanje i osposobljavanje vatrogasaca i održavanje opreme i vatrogasnih sredstava, te investicionu izgradnju i opremanje objekata za potrebe vatrogasnih jedinica.

Uslove, prioritete i način korištenja sredstava iz stava 1. ovog člana, a za namjene iz stava 3. ovog člana, utvrđuje Općinski načelnik na prijedlog Službe za civilnu i protivpožarnu zaštitu Općine.

Kontrolu uplate sredstava iz stava 1. ovog člana vrše nadležni organi i službe Federalnog ministarstva za financije.

Član 84.

Dobrovoljna vatrogasna društva financiraju se iz sredstava koja osiguravaju osnivači društva, sredstava donacija i drugih vrsta pomoći fizičkih i pravnih lica, kao i sredstava koja se za njihove aktivnosti osiguraju u budžetu Općine.

Član 85.

Vatrogasni savezi financiraju se članarinom svojih članova, donacijama i drugim vrstama pomoći pravnih i fizičkih lica, kao i sredstvima koja se za aktivnosti saveza osiguraju u budžetu Općine.

Član 86.

U budžetu Općine osiguravaju se finansijska sredstva potrebna za servisiranje obaveza utvrđenih u članu 83. ove Odluke.

X – UPRAVNI NADZOR NAD PROVOĐENJEM OVE ODLUKE

Član 87.

Federalni organi uprave i Kantonalna uprava civilne zaštite vrše upravni nadzor u odnosu na pitanja koja su Zakonom o zaštiti od požara i vatrogastvu stavljena u njihovu nadležnost, a ostvaruje se u pravnim licima, organima uprave i općinskim službama za upravu na području Općine.

Član 88.

Upravni nadzor iz člana 87. ove Odluke odnosi se na nadzor nad zakonitošću poduzetih aktivnosti i mjera u oblasti zaštite od požara i vatrogasne djelatnosti, prema Zakonu o zaštiti od požara i vatrogastvu.

XI – INSPEKCIJA ZA ZAŠTITU OD POŽARA I VATROGASTVA

Član 89.

Inspekcijski nadzor u oblasti zaštite od požara i vatrogastva u organima uprave na području općine i pravnim licima od značaja za Kanton sa sjedištem u Općini i od značaja za Općinu, vrši Federalna Uprava civilne zaštite i Kantonalna uprava civilne zaštite svako u skladu sa svojim ovlastima iz članova 145. i 148. Zakona o zaštiti od požara i vatrogastvu.

Član 90.

Inspekcijski nadzor u oblasti zaštite od požara u pravnim licima i drugim institucijama u privatnom i državnom vlasništvu na području općine, vrši Federalno ministarstvo unutrašnjih poslova i Kantonalno ministarstvo unutrašnjih poslova svako u skladu sa ovlastima iz člana 151. Zakona o zaštiti od požara i vatrogastva.

Član 91.

Inspekcijski nadzor nad provođenjem mjera zaštite od požara u šumama i nad šumskim zemljištem obavljaju šumarski inspektori, nad poljoprivrednim zemljištem obavljaju poljoprivredni inspektori, a za zaštićena područja prirodnog i kulturno-historijskog naslijeđa nadzor vrše inspektori iz te oblasti po propisima kojima su uređene inspekcije u tim oblastima.

Član 92.

Nadzor nad sprovođenjem odredbi ove Odluke, a koje se odnose na loženje vatre na otvorenim prostorima (član 35. do 46.), vršit će Policijska stanica Cazin, općinska komunalna inspekcija, šumarska i poljoprivredna inspekcija, svako iz okvira svojih nadležnosti.

U obavljanju nadzora nad sprovođenjem odredbi ove Odluke iz stava 1. ovog člana, pomažu pripadnici Profesionalne vatrogasne jedinice, komunalni redari, lovočuvari, ribočuvari i dr.

Pomoć osoba iz stava 1. ovog člana, sastoji se u dojavu o nastaloj povredi odredbi ove Odluke i u prikupljanju podataka o identitetu osoba koje su izvršile povredu tih odredbi.

XII KAZNENE ODREDBE

Član 93.

Kaznene odredbe Zakona o zaštiti od požara i vatrogastvu, Zakona o šumama, Zakona o poljoprivrednom zemljištu, i drugih regulišu prekršajnu odgovornost i raspone novčanih kazni za učinjene prekršaje, za nepridržavanje odredbi istih.

Član 94.

Novčanom kaznom od 150,00 do 500,00 KM kaznit će se građani:

- a. ako bace zapaljene šibice, opuške, pirotehničke i druge zapaljive tvari na otvorenim prostorima (član 36.),
- b. ako loži vatru na otvorenom prostoru u razdoblju od aprila do oktobra (član 37. stav 1.),
- c. ako u razdoblju iz člana 37. koristi roštilj protivno preventivnim mjerama zaštite od požara (člana 37. stav 2 i stav 3.),
- d. ako u razdoblju iz člana 37. obavlja radnju (npr. zavarivanje, brušenje i sl.) koja može prouzrokovati vatru na otvorenom prostoru suprotno propisanim uslovima čija je svrha sprječavanje nastanka i širenja vatre na obližnjem otvorenom prostoru (član 37.),
- e. ako loženje vatre u razdoblju od aprila do oktobra obavlja bez odobrenja nadležne Vatrogasne jedinice ili pravne osobe koja upravlja zaštićenim dijelom prirode ili šumom (član 38.),
- f. ako se ne pridržava preventivnih mjera prilikom spaljivanja (član 39.).

Novčanom kaznom od 300,00 do 2.000,00 KM kaznit će se fizičko lice obrtnik i osoba koja obavlja drugu samostalnu djelatnost koju je počinila u vezi obavljanja njezina obrta ili druge samostalne djelatnost:

- za prekršaje pod tačkom *b, d, e, f* stava 1. ovog člana.

Novčanom kaznom od 500,00 do 3.000,00 KM kaznit će se pravno lice:

- za prekršaje pod tačkom *b, d, e* stava 1. ovog člana,
- ako ne vodi ili neuredno vodi zapisnik o zahtjevima za odobravanje za spaljivanje (člana 40.),
- ako ne donese ili ne provodi propisani preventivno-operativni plan (člana 42. stav. 1. i stav 2.),
- ako ne obezbjedi kontrolu požarišta, nakon lokalizacije požara, u skladu sa članom 75. stav 2. Zakona.

XIII – PRIJELAZNE I ZAVRŠNE ODREDBE

Član 95.

Pravna lica, državni organi i druge institucije iz člana 21. ove Odluke dužni su donijeti, odnosno uskladiti sa ovom odlukom opći akt (pravilnik) o zaštiti od požara u roku od 6 mjeseci od dana stupanja na snagu ove Odluke.

Pravna lica, državni organi i druge institucije, dužni su u roku od 6 mjeseci od dana stupanja na snagu ove Odluke odrediti zaposleno lice zaduženo za provođenje mjera zaštite od požara.

Službu zaštite od požara iz člana 21. stav 2. ove Odluke, pravna lica su dužna organizovati u roku od 6 mjeseci od dana stupanja na snagu ove Odluke.

Član 96.

Pravna lica iz člana 64. stav 2. ove Odluke, dužna su organizovati vlastitu vatrogasnu jedinicu u roku od godinu dana od dana stupanja na snagu ove Odluke.

Član 97.

Danom stupanja na snagu ove Odluke prestaju da važe sve ranije donešene odluke i propisi koje definišu ovu oblast.

Član 98.

Odluka stupa na snagu osmog dana od dana objavljivanja u „Službenom glasniku općine Cazin“.

Broj : O1/V- 44-10344/12

Cazin,31.07.2012.godine

PREDSJEDAVAJUĆI VIJEĆA

Ćoralić Haris



Broj:07-44- /
Datum: ----- godine

Uručeno dana: _____

(potpis pravnog / fizičkog lica)

ODOBRENJE
za loženje vatre na otvorenom prostoru
(**sastavlja se u dva primjerka**)

1. Odobrava se _____ iz _____
(fizičko lice ili pravno lice)
da može upotrijebiti otvorenu vatru u mjestu _____ na
prostoru – predjelu zvanom _____ površine od cca
_____, koje je vlasništvo _____,
dana _____ od _____ sati do _____ sati.
2. Prilikom upotrebe vatre na otvorenom prostoru potrebno je provesti preventivne mjere zaštite od požara, da se vatra ne proširi na obližnje površine ili objekte, a naročito (**zaokružiti eventualno dodati**):
 - a) Spaljivanje tvari se mora obaviti na sigurnoj udaljenosti od obližnjih površina ili objekata (npr. šuma, voćnjaka, vinograda, elektroenergetskog voda, cesta, stambenih kuća i dr.),
 - b) Oko mjesta spaljivanja pripremiti sigurnosni pojas (očistiti okolno zemljište u krugu od najmanje _____ metara),
 - c) Ovisno o količini i vrsti gorivih tvari, te veličini površine na kojoj se obavlja loženje otvorene vatre osigurati prisustvo _____ osoba sposobnih za gašenje vatre,
 - d) Uz mjesto spaljivanja osigurati osnovna sredstva za gašenje ostataka spaljenih tvari i proširivanje vatre (voda, lopota, _____),
 - e) Spaljivanje provesti na dan kada nije utvrđena velika ili vrlo velika opasnost za nastajanje i širenje požara i za mirna vremena odnosno kada ne puše umjereni vjetar ili drugi vjetar iznad jačine vjetra koji puše brzinom od 5 m/sek ili više, kada je potrebno odgoditi ili prekinuti spaljivanje,
 - f) Osobe koje su obavile spaljivanje dužne su mjesto spaljivanja pregledati i ostatke vatre (žar i sl.) u potpunosti ugasiti.
3. Za proširenje vatre izvan odobrenog otvorenog prostora, odgovornost snosi fizičko lice ili pravno lice iz tačke 1. ovog Odobrenja.

Dostavljeno:
1. Naslovu,
2. Evidencija,
3. Arhiva

Pomoćnik općinskog načelnika

Mujić Said, prof.

Obrađivač:

Komandir PVJ